

# LA PRISE DE

LA VILLE DE PAMIERS,  
Capitale du Pais de Foix, des nommez  
Beaufort, Lieutenant General des Ar-  
mées du Duc de Rohan, & d'Auros Gou-  
verneur de Mazeres.

*Ensemble la defroute de toutes les troupes  
dudict pays.*

Avec les Articles accordez aux Capitaines,  
soldats & habitans de Pamiers.

*Plus le nombre des prisonniers, & de ceux qui  
ont esté penduz, & menez aux Galeres.*

Et le Restablissement de la Sainte Messe,  
en ladite Ville.

*Par Monseigneur le Prince, Lieutenant Ge-  
neral pour le Roy en ses Armées de Lan-  
guedoc, Guyenne & Dauphiné.*



A PARIS,  
De l'Imprimerie de JEAN BARBOTE, en  
l'Isle du Palais, rue de Harlay à la Fleur  
de Lys Couronnée.

M. DC. XXVIII.

*Avec Permission.*


Case  
F

39

326

1628 pr





## LA PRISE DE LA VILLE

*de Pamiers , capitale du pays de Foix,  
des nommés Beaufort , Lieutenant  
general des Armées du Duc de Rohan,  
& d'Auros , Gouverneur de Maze-  
res.*

**L**E grand bruit qui se faisoit de la construction d'une Citadelle que bastissoit Beaufort, Lieutenant general de Monsieur de Rohan en Foix, dans la ville de Pamiers, capitale du Comté de Foix, siege de l'Euesché dudit pays, & l'une des plus grandes villes du ressort du Parlement de Tholose, & le grand preiudice qu'elle estoit capable d'apporter au service du Roy, si une fois elle estoit en estat, fit resoudre Monseigneur le Prince de l'aller assieger promptement avec trois mil cinq cens hommes ou environ, qu'il auoit en Garnison dans le haut Languedoc, bien que les ennemis fussent pour le moins douze cens hommes, & depuis

quinze cens, par le secours qui leur vint. Les choses necessaires pour l'execution de ce dessein furent incontinent & diligemment ordonnées.

Le rendez-vous fut donné dans le Foix aux troupes, qui consistoient en dix compagnies de Normandie, au Regiment de Phalsbourg, celui de Sainte Croix, & les Regimens d'Hannibal & de Bioulle, qui ne sont que de cinq cens hommes, avec quelques communes ramassées dans les Montagnes de Foix, le tout ne faisant guere que trois mil cinq cens hommes effectifs. Monseigneur le Prince fit sortir de l'Arsenal de Tholose cinq Canons, deux Couleurines & vn Courtault, des munitions necessaires pour les tirer mille coups, & autres pour les Soldats.

Après l'ouverture des Estats de la Province du Languedoc, il partit de Tholose le Samedi quatrielme de Mars, & fut coucher à Antherines, d'où il fit conduire quatre des Canons, & quelques munitions qui estoient au lieu de Dampouillac, rendez-vous general des troupes, où il les fit camper ceste nuit là pour passer lesdits Canons & munitions entre Mazeres & Sauerdun,



3  
villes ennemies, proche desquelles le chemin de Pamiers s'approchoit.

Estant party le Dimanche matin, il arriua au Camp enuiron sur les neuf heures, où il trouua l'Armée en ordre de bataille, laquelle il visita de bataillon en bataillon, & toutes les troupes de Caualerie, puis les fit marcher en bon ordre du costé de Montault, siza au milieu d'une grande plaine, sur les bords de laquelle sont situez comme en triangle les villes de Pamiers, Sauerdun & Mazeres, & en sont esgalement distantes, & y campa ceste nuit.

Le Lundy ayant disposé l'Armée en bon ordre, il fit faire les approches si heureusement qu'il n'y eut que deux de nos Soldats tuez. Son intention estoit d'attaquer la ville entre les portes Sainte Helene & de Lestang. Il fut conseillé de la changer, & de l'attaquer en vn certain lieu appellé Lhoumet, separé de la ville par vn petit ruisseau, faisant partie d'icelle. Mais après auoir luy-mesme recogneu & considéré la ville, il se tint à sa premiere resolution, quelques remonstrances que l'on luy peust faire au contraire. Il fit doncques aduancer la nuit du Lundy au Mardy les logemens à main.

droicte, pour battre la place entre lesdites portes. Ce qui fut tres à propos : car ce lieu de Lhoumet estoit retrenché de la ville, par des cornes & grands fossez qui estoient capables de l'arrester long temps, & luy faire ruiner le peu de gens qu'il auoit, ainsi que Beaufort luy-mesme a déclaré.

Les ennemis voyans que les logemens estoient ainsi aduancez à main droicte, entre lesdites deux portes, ils gaignerent hastiue-ment vne butte de terre vn peu esleuée de ce costé là, sur laquelle ils se logerent, & s'y fortifierent en toute diligence avec des Barriques & retrenchemens qu'ils firent faire par les femmes, lesquelles en fort grand nombre y alloient trauailler. Ils venoient de là escarmoucher aux nostres. Ce qui obligea Monsieur le Marquis de Ragny de les aller serrer en ce lieu, par la prise de quelques Postes aux environs. à fin de les empescher qu'ils ne continuassent leurs escarmouches, Monseigneur le Prince estant pour lors dans lesdits logemens avec Monsieur de Montmorency. Plusieurs Gentilshommes volontaires qui y estoient venuz avec eux suiuiroient ledit sieur Marquis de Ragny, & entr'autres le Marquis de Fieu-



3  
marcon qui y fut tué d'une mousquetade dans la teste. Monsieur de Montmorency les suiuit pour les soustenir, & fort à propos d'autant que les ennemis venoient à eux de toutes parts resolu de tenir ceste butte, plustost pour nous diuertir, que pour aucun dommage qu'elle eust peu leur apporter, estant à nous. Cependant vne partie de l'Armée trauailloit souz la conduite de Regnauldin, à couper vne Digue qui faisoit entrer vn petit bras de la Riuere de Liege dans le fossé, tout autour de la ville. Les iours de Mardy & Mercredy se passerent en ses occupations.

La nuit du Mercredy fut employee à dresser la batterie, faire les plattes formes, planter les Gabions, les remplir, & preparer toutes autres choses necessaires pour battre. Le leudy tous ces preparatifs furent si diligemment faicts en vne nuit par les Officieis de l'Artillerie, que les Canons furent prests à battre sur les neuf heures du matin, & commencerent à saluer les ennemis. La continuation de la batterie fut si viue, que sur les quatre heures il y eut bresche raisonnable: laquelle Monseigneur le Prince ayant recogneuë, avec Messieurs les Maref-

chaux & Maistres de Camp, il y fit donner par quelque compagnie de tous les Regimens, avec ordre de se loger seulement dessus, sans entrer plus auant: d'autant qu'il y auoit à droict & à gauche deux petits bastions de terre, & vn grand retrenchement qu'auoit faict autrefois saint Blancard, & qui auoit esté mis en estat par les ennemis pour defendre la bresche. Ils firēt ponctuellement ce qui leur auoit esté commandé: Et au moyen des Bariques, Fascines, & sacs qui leur furent portez, ils se logerent, en façon qu'ils incommodoiēt fort les ennemis dans leur retrenchement, sans estre incommodez, & gaignerent le dessus du Portail de sainte Helene, d'ou ils les tiroiēt à descouuert.

La nuit se passa doucemēt sans grandes escarmouches de part ny d'autre. Il arriua trois cens hommes de secours aux ennemis, qui perdoient courage de se defendre, quand ils virent nos gens si proches d'eux.

Le iour venu la batterie commença aux maisons ioignantes leurs retrenchemens: d'autant qu'elle ne pouuoit donner dedans, quand enuiron sur les neuf heures du matin vn Tambour vint de la part des ennemis supplier



supplier Monseigneur le Prince de leur  
 donner la vie. Et au mesme temps l'on des-  
 couure de toutes parts des troupes d'hom-  
 mes, & de femmes, & d'enfans qui fuyoient  
 par le haut des montaignes, sautoient les  
 murailles, passoient la riuere avec vne e-  
 strange frayeur & apprehension. Les sol-  
 dats courent de tous costez, prennent des  
 prisonniers, les amenant au Camp en si  
 grand nombre, qu'en peu de temps il s'en fit  
 iusques à trois cens. Ceux qui gaignoient  
 les Montaignes estoient massacrez par les  
 payfans qui accouroient de toutes parts à  
 ce desordre, pour venger les maux qu'ils  
 auoient receuz par les courses des rebelles.  
 Pendant que la ville tenoit, l'animosité des  
 Soldats vint iusques à ce point, que dans le  
 Camp mesme ils en tuerent de sang froid à  
 coups de pierre quelques vns, sans qu'il y  
 eust moyen de les empescher. Ceux qui fu-  
 rent pris rapporterent que Beaufort & A-  
 uros, Gouverneur de Mazeres, & son Lieu-  
 tenant dans le Foix, estoient sortis, & leur  
 auoient montré le chemin de la fuite, ledit  
 Beaufort à pied, son cheual luy ayant esté  
 arresté par vn de ses Soldats qui le voulut  
 tuer. Monseigneur le Prince enuoya de



tous costez la Caualerie pour les prendre. En fin après vne longue queste, Beaufort fut trouué couché dans vn bois avec son valet, par Regnauldin, Mareschal des logis de l'Armée, & quelques Carabins des Gardes de mondit Seigneur : & Auros fuyant du costé de Sauerdun pour s'y retirer : tous deux furent pris, & sont entre ses mains, pour en faire ce qu'il plaira au Roy : ensemble de la Palme, domestique de Monsieur de Rohan, qui assistoit encores Beaufort en ce siege. Des autres prisonniers huit des plus seditieux ont esté pendus dans la place de Pamiers, entr'autres le premier Consul nommé Prat, qui mit Monsieur de Rohan dans la ville, & vingt autres ont souffert mesme peine dans Varilles, six vingts des plus robustes ont esté mis à la Cadene, & enuoyez à Tholose pour estre conduits aux Galeres. Le surplus est demeuré entre les mains des Soldats, pour en retirer ce qu'ils pourront de rançon.

Les gens de guerre qui sont demeurez ont eu la vie sauue, & se sont retirez, laissant leurs Drappeaux, au nombre de six, bagages, Armes & cheuaux, & deux Canons, le baston blanc en main : comme aussi les ha-



bitans, desquelstous les biens sont demenez à la discretion de mondit Seigneur le Prince, pour en faire ce qu'il plaira à sa Majesté. Les soldats ont pillé tous les meubles, iamaïs il n'a esté possible de les en empêcher. Il y en a eu pour le moins, tant pendant le siege, qu'en ceste defroute, quatre cens de tuez, & trois cens prisonniers. Et le surplus est en estat de ne pouvoir faire mal de long temps.

Il est impossible de raconter avec quelle diligence, courage & generosité Messieurs du Bourg, Marquis de Ragny; & Comte de Carman, Mareschaux de Camp se sont portez en ceste occasion: & generally tous les chefs, tant d'infanterie, que de Cauallerie, mesme les Soldats, desquels il ne s'est pas perdu vingt où vingt-cinq en ceste execution, qui se doit veritablement attribuer à la protection singuliere qu'il plaist à Dieu de prendre des Armes du Roy, qui portent vne espouventable frayeur à ses ennemis. Aucun Capitaine n'a esté tué, vn seulement a esté blessé, qui est le Baron de Montdeieu, d'une mouquetade dans le bras, & d'une autre fort fauorable qui ne fit que luy effleurer les leures. La Haye, ay-

de de Camp, de deux mousquetades.

Le lendemain matin Monseigneur le Prince a fait rendre graces à Dieu de ces heureux succez, par vne Procession solennelle qui s'est faicte dans ladicte ville de Pamiers, & par la celebration de la Messe dans le Temple des Huguenots, que mondit Seigneur le Prince a donné au sieur Euesque dudit lieu, & à ses Chanoines, attendant que les habitans ayent rebasty leur Eglise Cathedrale qu'ils ont demolie. Il a remis dans leurs biens les quatre Ordres de Religieux mandiens qui auoient de tres-beaux Conuents dans ladite ville, & les Iesuites vn College.

F I N.





*LES CAPITAINES, SOLDATS, & habitants qui sont dans la ville de Pamiers, ayans tres-humblement supplié Monseigneur le Prince de leur vouloir faire grace, leur a accordé ce qui s'ensuit.*

**P**REMIEREMENT, Qu'ils feront serment de ne porter de leur vie les armes contre le service du Roy.

Que les Capitaines sortiront avec l'espée seulement, & les Soldats le baston blanc.

Qu'ils laisseront toutes leurs armes, bagage, Cheuaux & Canon, ensemble leurs drapeaux.

Que les habitants auront la vie sauue, sauf le nommé Prat, & tel autre qui se trouuera auoir fauorisé l'entrée de Monsieur de Rohan dans leur ville.

Que tous leurs biens demeureront à la discretion de mondit Seigneur, pour en disposer comme bon luy semblera.

Quelles gens de guerre seront escortez  
iusques à Paillé, à fin qu'il ne leur soit mes-  
faict, dont mondit Seigneur leur donne sa  
parolle.

Qu'il leur sera donné deux Charrettes  
pour emmener leurs blesez iusques audit  
lieu.

Faict au Camp deuant Pamiers, le dixief-  
me iour de Mars, mil six cens vingt-huict.



## PERMISSION.

**I**L est permis à Iean Barbote, Maistre  
Imprimeur & Libraire à Paris, d'imprimer  
ou faire imprimer, vendre & distribuer  
*La prise de la Ville de Pamiers, &c.*  
Et deffenses à tous autres Imprimeurs &  
Libraires de l'imprimer, ny vendre. Faict  
ce dix-huictiesme iour de Mars mil six  
cens vingt-huict.

1831